



Siunnersuut uunga: Namminersorlutik Oqartussat pigisaannik sillimmasiisarfirmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piumasaaqatitariumaagai, soorlu aningaasartuutissat aammalu sulisussat pillugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq)

Anthon Frederiksen, Partii Naleraq siunnersuutaa imatut partii naleqqamiit taperserlugu oqaaseqarfigissuarput.

Partii Naleqqap tunngaviumik anguniagarivaa nunatsinni massakut akuersarneqarsinnaanngitsumik nunatsinniit aningaasat kuussuartut supisutut aniatinnarneqarnerat, taamaattumillu nunatsinni nammineq aningaasaqarnikkut sector-imik pilersitsinissarput. Suulluunniit nunap Naalakkersuinikkut aqutsisullip qitiulluinnartutut tamanna ingerlattarpaa.

Aningaasaqarnermilu sector-i ukunannga qitiusumik imaqartarpoq: Aningaasariviit, illuliornermik atorniartarfiit, soraarnerussutisiaqalernissamut aningaasaateqarfiit aammalu, uani siunnersuutigineqartuut, sillimmasiisarfiit. Taakkunani ataasiinnaq maani pilersinneqarnikuvoq, tassalu SIK-p soraarnerussutisiaqarnermi aningaasaateqarfia. Partii Naleqqamiit apererusunnarpoq soq taama aningaasamik ingerlatsinermi una sectori qitiulluinnartigisoq suli Naalakkersuisut piumasuseqanngilluinnarqinnaartiginerat, allaat uumap siunnersuutip itigartisissutigineqarnissaa itigartissutigalugu, qaavatigullu tunngavilersuutunik taama ikkalluinnarqinnaartigisunik saqqummiussigamik. "Naalagaaffeqatigiit" iluanni Savalimmiut qangarsuarli qanoq sector-ip avaqunneqarsinnaanngilluinnarnera ilisimaarilernikuugamikku tamaasa pigivaat, allaat maani aningaaseriviteqarlutik, sillimmasiisarfiutaasalu ilaata aningaaserivitsitut taaniartagarput pigillugu. Taamaattumik aperisariaqarpugut suunuku isit atorlugit nalilersuisoqartoq, Partii Naleqqamiit qularinngilluinnarparput Savalimmiuni nammineq inuiaassusertik tunngavigilluinnarlugu ingerlatsigamik taama siuarsimatigisut.

Nunanut allaniit sanilliulluta pisortat pigisaat eqqaareernitsituut annertuupilussuupput, taamaattumillu pisortat sillimmasiinissaminut annertuumik pisariaqartitsillutik, massakkullu nammineerluta sillimmasiisarfeqannginnerput peqqutigalugu aningaasat avammut kuuinnartut. Taakkuinnaalluunniit pissutissqalersittussaangaluarpaatigut namminersatsinnik pilersitsinissamik, suli illuutillit, angerlarsimaffimmi pigisaminnik sillimmasiisartut, angallatiminnik, biiliminnik, umiarsuaatitsinnillu ilaalu ilanngullugit sillimmasiinissat tikinnagilluunniit. Ila atorfilittanik qoqassinneqarsimaneq qasunaannarani aamma nunatsinnut miliartunik naleqalerpoq, uparuarneqartullu illersorneqalerlutillu, uffa taakku nunatsinni ajornatorsiuteqarnitsinnik pilersitseqataappata siulliullugit iluarsivigineqartussat. Uppernarsereerparput sillimmasiisarfiit massakut maaniittut asuli aningaasaatitsinnik avammut kuutitsiinnartut, tamakkulu Naalakkersuisut illersorusunnerugaat uani uppernarseqqiinnarparput.

Ukiumut 100 miliuuni koruunit missaani ilisimasagut malillugit, sillimmasiisarnermut atortarpagut, taakkulu massakutut ingerlatsinerlunnitta kingunerisaanik, oqarnitsituut kuussuartut supisutut avammut kuuinnarput – taamaattumik.

Inussiarnersumik paatsoorneqarsinnaanngitsumilli Naalakkersuisunut eqqaassutigilarput Naalakkersuisunngornermi Naalakkersuisut allaffissinni pequtinik nutserineq aqqissuusseqqinnermik taaneqarsinnaanngimmat. Aqqissuusseqqinniarussi inuiaqatigiinnut iluaqutaasumik timalimmik iliuseqaritsi.

Taama oqaaseqarluta, Partii Naleqqamiit una siunnersuut aningaasaqarnermi sector-imik pilersitsiniarnitsinnut naapertuummat tamakkiisumik taperserlugu asiunnersuutip appasaaniinnginnermini aningaasaqarnermut ataatsimiititaliamut suliarineqarnissaa innersuussutigissavarput.